

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 76 (1991)
Heft: 3

Artikel: Cunfins controllai, quei fuss ...
Autor: Cadruvi, Maria / Jacomet, Ervin
DOI: <https://doi.org/10.5169/seals-881889>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

C U N F I N S
 C O N T R O L L A I
 Q U E I
 F U S S

M A R I A C A D R U V I

Fotografias: Ervin Jacomet

Miu apparat da registrar tuns sin pindel ha in limitader. «Limiter on/off» stat ei scret sper in nuv. Sche quel ei sin «on» ed ils tuns ein memia ferms, entra il limitader automaticamein en funcziun e metta cunfins. Ed ils tuns registrai van buc sur ina fermezia determinada o. Els vegnan normai. La clarezia e bellezia dalla registraziun sa fòrsa esser periclitada in stel tras quei. Aber mo forsa e mo in stel. Quei ei normal e fetg pratic.

Atgnamein fuss ei pratic sch'ils autos vessen era in limitader. 100 e basta. Tier la televisiun stuess ins baghegiar en dus. In limitader da 10 minutas per affons ed in da 70 per carschi. A di. Ei dess in limitader da consum ed in da rumians. L'aua du-

vress era in limitader. Cu ella fuss tartignada avunda spidass ella anavos. L'aria, lezza vegness melna suenter ch'ella vess contonschiu il grad lubiu dad impestaziun. E la tiara sesarvess e laguttess quels che massen memia lunsch, cavassen memia profund, engarschassen ella cun memia bia pestizids ni curclassen ella cun memia bia beton. Mintgin savess quei. Quei fuss normal e fetg pratic.

En quei mund limitau ch'jeu skizzeschel han ils carstgauns secapescha lur limitaders persunals. Negin ha mal il venter pli e negin ei eivers e stuorns pli grazia als limitaders. Ina roscha da quels ein montai directamein sin la pial, era sin fatscha. Mintgaga ch'in human di ina manzegna ni vul schar crer ni valer zatgei ch'ei buc, sbrinzlan in ni plirs limitaders. Ni sussuran stinadamein. Sch'in carstgaun entra el mund dil concarstgaun senza consentiment tarmettan ils limitaders medemamein signals. Buc mo en cass d'engons ed enguladetschs, era en cass da violaziun, da suppressiun, dad explotaziun. Aschia han ils carstgauns da patertgar nuot pli. Els drovan buc filosofs e buc advocats. Els san schar sura tut als limitaders. Il sulet

ch'els han da far ei da tractar la damonda, tgi che decidi e camondi sur da tut ils limitaders: Ed els ston decider schebein els vulan era integrar ils animals el sistem da limitaders. Aber inaga che gliez ei sclariu va tut da sez. Ils temps per la lavur ei limitaues ed il temps pil temps liber. Il temps da legria ed il temps da tristezia. Ils cars-tgauns vivan en liunguriala, mo en pasch. Els han gie tut quei ch'els drovan. Dapli fa buc da basegns. Tut stat sco igl ei. Ils cars-tgauns van mai sur las lattas, vegnan mai en empruament da menar ina veta sfrenada e lischada. Igl ei uorden. E quei ei normal e fetg pratic.

Bien, en quei mund limitau vein nus buc la libertad da decider. Nus enconuschein buc la brama ed il giavin. Nus savein buc tgei che siemis ein e fantasias. Nossas marveglias e nossas ambiziuns ein satradas. Da visiuns vein nus mai udiu ed il plaid svilup dat ei buc. Mo schiglioc fuss tut normal e fetg pratic. Fuss. — Mo per cletg eis ei buc.

Per cletg ein ils cunfins buc controllai da limitaders. Per cletg ein els variables e buc fixai per adina. Els accumpognan nus ina veta entira, gliez bein. E sche nus lein

Seivs termineschan
seivs zeivran
seivs spartan.

Seivs fan ina differenza
seivs fan uorden.

Seivs gidan
a pertgiran en
e pertgiran o.

Per tgiran
tgei
e tgi?



CM, Val



Tschella notg eisi schabegiau. Dau ha ei ina sfraccada ch'ls gats han pigliau tema. Pervia dad els vess negin stuiu far largias pli grondas ella seiv. Agl auto ha ei fatg pauc. Mo ina cazzola zatgei ei rutta. Il paraculp ha pudiu tener. Ins sa buc tgi. Aber per posta da dus spizzauls e miez vegn bein negin a far teater. Quels quater lenns san ins gie remplazzar. Igl auto va halt nundadiu sur ses cunfins o. Num da Diu?

Quei numna el
la libertad senza cunfins.
Cu la suletta puorla ch'ei le-
venta
ha num neiv nova.
El drova dus fests
per penetrar
e lai anavos fastitgs
sin ina cozza alva
ch'ei buc la sia.

Siu tec tschurvi
seigi para splattergnaus
denter duas aissas
dad ineditgonta l'ina.



buc veser el sche stuein nus magari sentir els. Mo per vegnir vinavon eis ei impurtont che nus saveien ir sur cunfins. Sur ils nos — e buc sur quels da tschels. Quel da Medel era halt ius sur omisdus. El veva mess tratsch da siu iert en ses calzers ed era ius dall'uatga si d'alp vi sil tratsch da tschels. E pretendiu ch'el stetti aunc adina sin agen tratsch. En la detga dil bov da Lavaz essan nus lu vegni sissu che quei um hagi vulnerau la cultura da cunfins. E nus vein empriu che buns cunfins festchien buns vischins. Senza ch'ins vess saviu dir clar e bein a nus tgei che buns cunfins seigien. Las novitads rapportan mintga di da cunfins surpassai. Avon in temps han ellas rapportau che «il mir» seigi curdaus. E nus vein liu crer che tut vegni meglier. E vein emblidau per in amen ch'ei dat sper ils cunfins da crap era cunfins nunveseivels. En nos tgaus. Nua ch'ins sa nuota adina discuorer cun la guardia da cunfin. Perquei ch'ella ha ses principis e basta.


Atgnamein dat ei mo duas sorts cunfins. Ils mes ed ils tes. Ils mes stoi jeu enconuscher. Ils tes vai jeu da risguardar e respectar. Mo enqualga calan mes cunfins

pér ditg suenter ch'ils tes han gia entschiet ni ch'ils tes entran d'uriala leu nua ch'ils mes ein aunc avon maun. Sche limitaders ein buc dentuorn, sche sedat da tuttas sorts ord talas situaziuns: camps da battaglia, plazzas da giugs e divertiment ni letgs d'amur. Perquei che propi destrucziun ni vera veta nova dat ei mo

senza limitaders. Quei ei buc adina normal. Ed era buc adina fetg pratic. Mo quei ei la veta.

Igl utschi che sgola suravi po crer ch'ei hagian ussa perfin fatg in parcadi entuorn baselgia.

Mintgin che stat sin tiara ferma sa denton che quei ei in liug da ruaus. Tgi ch'ha anflau cheu siu davos plaz ha sli-giau ses cunfins. Ha buc da cumbatter pli sin tiara. Buc per sesez e buc per in plaz per siu vehichel.



Dieus propons . . .

Mustér, 1923



... ed il carstgaun dispona

